

Anwà'anè JEMS

NJI'INNŪ ANWÀ'ANƏ YŪ

A anwà'anè yū aa a le ηηwà'anə Jems muma bī Yesu a mbo bīKrisèn bīi mə bī le njà'à waa bī tswé a itoo itoo aà. Jems à le ηki mbə ntsyàsə a nghotə a Yerusalem.

Jems à ηwà'anə ndi'itə nī bə bī Nwī ni innū jī ghà'atə, lá má ànnū yīi mə à ghàa ghu aa à nī àbīintiī. Nswonə ni mə bī yə abīintiī ηū aa a ni ifà'á yi bo bī mighèrìnə mi innū mi. Kaa àbīintiī yīi mə ηū a swonə tsi'ī nī ntsū aa kaa à si abīintiī yīi mə a yweensə ηū aa bē. Tá bə bīi mə bī bīi Nwī aa tá bī kīi ηghirə nī ànnu yīi mə nighàà ni Nwī ni swonə aà, kaa wa'a kà nyu'u tsi'ī yū'ù, kaa wa'à ni nu ka mfa'a (1.22-25). Jems a bú ηghaa annū nlon mitsyè (1.5-8), ηù yīi mə a bon mitsyè aa tá à betə a mbo Nwī nī abīintiī. Ndi'itə nī bə bī Nwī mə tá bo ka nzi ntswā àlèè yaa (3.1-12), ntsuu milò'ò mi bīlîm byaa ki tɔ'otə, (4.11-12) ntsuu kīi ki kàà, tá ηηə ηù tá à bə ηηə (5.12). Tá bə bīi mə bī bīi Nwī aa tá bo ka ntswa nī ntiī waa ηkīi ntsa'atə nī Nwī a noò ηgi'ì. Bεε bo ti ghòò, bo ká mbīi nī ifǎnsənnū jyaa bo ni bo, ηka ntsa'atə nī Nwī (5.13-18) nlon mə Nwī a yu'u atsà'atə Nwī ηù yīi mə à tswe nī abīintiī aà.

Jems à nanjə ηηwà'anə aa innū jīi mə mbə i kwetə bə bī Nwī a mūm ntswēntīi yàà, ηkwetə nī waa mə bī ka ηkhə Satan, bo bī ànnū ηkōŋ

njoo mbi jù, m̀baṅṅə ḡka nyonṡə a mbèε Nwĩ tã bə b̄subika'â bi tsõ Abraham (4.1-8).

Bi yatê aṅwà'ànè yú aa laà:

1. Nji'innũ aṅwà'ànè yuà 1.1
2. Abiintii ni m̀tsyè 1.2-8
3. Annũ ḡgàṅəfumə bo bi ḡgãṅkabè 1.9-11
4. Annũ nywe'etə ḡù bo bi àkwà'ànè 1.12-18
5. ḡka nyu'u niḡhàà ni Nwĩ ḡkii ḡghirə 1.19-27
6. Áwà'àsè ñloṅ annũ a ḡka ntε'ε nàndènè a titii bə 2.1-13
7. Abiintii bo àfà'à 2.14-26
8. Krisèn bo àlèè yi 3.1-18
9. Krisèn bo bi njoo mbĩ 4.1—5.6
10. Idi'itè jĩ mɔ'ô 5.7-20

¹ A ni m̀ə Jems, ḡgàṅàfà'a Nwĩ ni yĩ Mmà'àmbĩ Yesu Kristo, m̀ə tsà'atè ḡgwè'è baIsrael niḡhũm n̄tsòbaà yĩ m̀ə ì ja'anə n̄swetə a idigə tsim faa mbi aà.

Abiintii ni m̀tsyè

² Bilĩm b̄a, ni ka naṅsə ndoritə a nòò yĩ m̀ə mbuu ikwà'ànə tsim ì tsi'i ḡhuu aà;

³ ñloṅ m̀ə ni bə tswa ntii ḡhu ì tsi'ã àkwà'ànè yĩ m̀ə a ywe'etə n̄ àbiintii yuu aa, boṅ ni ka tigə tswe n̄ àtãṅəntii.

⁴ Ni yə m̀ə àtãṅəntii yuu a ḡhεε n̄ mb̄ĩ a m̄m ḡḡ'i tã ni tsuu l̄ kaa, tã ni kwe ḡko'ò ntəṅ ḡku'unə, kaa wa'à ni àl'ò'ò tswê.

⁵ Lã mbə ḡù n̄bù a ti boṅ m̀tsyè, a ku'unə m̀ə tã à tsa'atə Nwĩ ñlɔɔ ḡhu mbô, boṅ à ka fa ḡhu mbô, ñloṅ m̀ə Nwĩ a fa njoo a mbo bə b̄tsim n̄ àb̄ṅəntii, kaa wa'à liṅè b̄.

⁶ Lâ bæe a ti tsà'atè Nwî a nñ òtìi yí ghu nú, òtsee ki jìnkè bê. Nù òtsim yíi mæ a jìnkè aa, à bæ aa tsó akàñə ñkì miyaa yíi mæ fifèrè a tii ñghæ mbù mbii ni yu aà.

⁷⁻⁸ Ajàñə ñù ma ya mæ a loo ni m̀ntii mi mbaa, ñjìnkè nî jìnkè nî ìnnù ji tsim aa, tâ à tsuu ló wa'atə mæ mbə yu kwerə àyoò tsu a mbo mmà'àmbî Nwî.

Ñgàñəfumə bo bì ñgǎñkabə

⁹ Ndim yi'inè yíi mæ à ni ñù tìkùm aa à tswe ñi ñka ndoritə a ajàñ yíi mæ Nwî à ñèntə yi a ndəñ aà;

¹⁰ tâ ñdim yi'inè yíi mæ à ni ñgàñkabə aa tâ kii ñka ndoritə a noò yíi mæ Nwî à s̀g̀sə yi a nsye aà, ñlon mæ ñgǎñkabə i ka yí wàñsè tsyà waa aa tsi'í tsó ìbwí'í ñgèè aà.

¹¹ Nòò a ki nta ntii aa, a tóò ñgèè i yorè; ìbwí'í ji i wòkè a nsye, ñìbòñ ni ni mē. A ki mbə ñgǎñ ñgǎñ ajàñ yíi mæ ñgàñkabə à ka yí tsyà yi, a noò yíi mæ a karə mfa'a nî m̀fà'â mi aà.

Akwà'ànè

¹² Nìdorə ni tswe a mbo ñù yíi mæ à lwí'í nî àb̀intii a noò yíi mæ ìkwà'ànè i zì ghu mbo aà ñlon mæ à bæ tsyà m̀buu ìkwà'ànè ma jù bæə bonə à ka kwerə miyàrinè mi ñgù'ù mi, tâ à bæ ntswentii ya yíi mæ Nwî à kà'a a mbo bè bii mæ bi kòñè yi aà.

¹³ Mbə mbuu ìkwà'ànè ma jù i yi ti zì a mbo ñù a tsuu ló swon mæ, “Ìkwà'ànè jù i lo aa a mbo Nwî.” Nlon mæ kaa mbə bi wa'à Nwî nî

innù jǐ bi kwa'ànè. Kaa yumbon a wa'à nii nù kii nkwa'anè nǐ ànnù yǐ bǐ.

14 Lá bi kwa'ànè nù aa wá noò mǎ innù jǐi mǎ a yè'ètè aa i swùntè mǎ yi nko yi tsǒ mǎtaà.

15 Innù jya mǎ a yè'ètè aa i tigè ghìrǎ a tswé ni ju tsǒ mu ntigǎ njwe ifǎnsǎnnù. Bεε mǎ ifǎnsǎnnù jya i yi nko'ɔ nluu, i jwe nǐwó.

16 Tá bì tsuu ghuu lõ bwe'esǎ mbá bɔɔ bi maà bá.

17 Mǎtǎnǎ mǐ sigǐnǎ mǐtsǐm bo bì nǐjòò jǐi mǎ i bɔɔ mǎnsǎ aa, tsi'ǐ tsǐm i lò aa aburǎ nsigǎ. I lò aa a mbo Nwǐngɔɔn yǐi mǎ à nǎnsǎ mǎnká'à mǐi mǎ mǐ tswǎ a aburǎ aa, mǎbǎ yu yǐi mǎ kaa à si kwensǎ, kǎ mbǎnkǎ tso alilǎn.

18 A nǐ nkòŋǎ yǐ, à lǎ nǎnsǎ yǐ'inǎ, nǐtsya aa a njǐm nǐghàà nǐi à nǐ ànnù nǐnkɔn aà, mǎ tá bǐ'inǎ bǎ bǐtsyà bi mbǐi a titǐi nǐgɔɔn nǐjòò tsǐm jǐi mǎ à lǎ nǎnsǎ aà.

Nka nyu'u nkii nghìrǎ

19 Bɔɔ bi maà bá nǐ ka nwa'atǎ annù yuà! A ku'unǎ mǎ tá nù nǐtsǐm tá à ka nwanǎ nyu'u ànnù, nǐtsee ki wǎnsǎ ghàa, nǐki tsee ki wǎnsǎ lwǐsǎ nǐ nǐtɔnǎ.

20 Nù yǐi mǎ a lwǐsǎ ntɔn aa kaa a si annù yǐ tsǐnǎ yǐi mǎ Nwǐ a lòò aa ghìrǎ.

21 Mamùu ajǎn a ku'unǎ mǎ nǐ me'e nǐgɔɔn innǐ nsǐn tsǐm bo bì àbǐ'intǐi tsǐmǎ. Mfa ibiinnù ghuu a mbo Nwǐ, mǎbii nǐghàà nǐi mǎ a bè a múm nǐti i bù aà, à nǐ nǐnghàà ma nú nǐi mbǎ nǐ nyweensǎ ghuu aà.

22 Nì tsuu atu ibhì nû ghuu ki bwe'esə a ŋka nyu'utə nìghàà ni Nwí tsi'í yù'ùtə. A ku'unə mə tá nì ka mfa'a ni nu.

23 Nù yíi a yu'utə nìghàà ni Nwí tsi'í yù'ùtə kaa ŋki'í ni nu fa'à aa, à bə aa tsi'í tsǒ nù yíi mə à lèntə nsí yi nî ñkè'è, ñyə ìbhì nû yi.

24 A naŋsə nlii ìbhì nû yi wa aa, a lô ñghεε yi. Fìbàŋtə ti tsyá a li'ínè ñkirè yí yá.

25 Lá nù yíi mə a naŋsə nlii bînòŋsə bya bîi mə bi boŋ mǎŋsə, ñketə ni mîŋkìrè mi atsaŋ a nu bə aa, à bə tɛ'ε átú yí ni bînòŋsə ma bú, kaa wa'à yu'utə tsi'í yu'utə m̀bu nli'ínè, lá m̀baŋnə nləə ni bînòŋsə bya, ñghìrə nî innù jii mə bi swoŋ aa, boŋ Nwí à ka niŋ mbɔɔnə nî innù tsim jii mə a ghìrə aà.

26 Mbə nù à tswe a titii bù yíi mə à wà'atə mə yu tinsə amúm ànnù Nwí lá kaa wa'ǎ ajàŋ yíi mə mbə yu tswá àlèè yi zi, boŋ ànnù Nwí yi ya à ni tsi'í ànnù adàŋə dàŋə. A kii mbwe'esə aa ìbiinú yí.

27 Ànnù yíi mə Taà Nwĩŋgòŋ a lògè tsi'í tsǒ ànnù Nwí yíi mə a naŋsə kù'ùnə, kaa wa'à nî àlò'ò tswé aa, a nî ŋka nləŋtə bɔɔ bitì ni bìkwí'í bi bāŋgyè a múm ñgi'í bo. Nki mbə a ŋka mbé ìbiinú gho tá m̀bi tsuu lǒ sɪŋ, i ta ŋgi'í a nu wò.

2

Ñwà'àsə ñloŋə annù nte'ε bìnàndènə

1 Bìlím bá tsi'í tsǒ ŋǎŋmbii Mmà'àmbí yí'ínə Yesu Kristo, yíi à ni Mfò nìgha'a aa, a ku'unə mə tá nì tsuu bə itu itu ki lèntə, ñyɔŋə bə ñkirə yàà.

² Kè bì'inè logə mə ɲàŋkabə yï mə à wè'ε karə yï mə bi naŋsə nî àtì gold bo bì itsè'ə atìndùù, à zï ɲkuu a mùm ɲghòtə bù, ɲgàŋafum a kî ñzi ɲkuu ghu ni bìkùrə bi atsè'ə bi.

³ Mbə nì gha'asə ɲû wa yï mə à wè'ε itsè'ə jï sigìnə aa, nswon ghu mbo mə, “Tswə faa nî àlən yî àkò'ònə falà.” Mbaŋnə nswon a mbo ɲgàŋafumə wa mə, “Ghεε ntəə filì, kè jwè'ènə a nsyε a mbèè mìkòrə mə,”

⁴ bəə bon ni tε'ε bînàndènə a titì bù, ñlentə nî ànnù ñyon nî àjàŋ mə ìnnù jï bi i tintə nî ghuu aà.

⁵ Yu'utè nì mbâ bilîm bâ, wa Nwî à tsò'ɔ ɲgàŋəfumə fàa mbi, ɲghirə mə tâ bo niŋ mîntì mya a nu Yesu Kristo, ì baŋnə mbə ɲgàŋafù'u ànnù nîŋkon, i yi nji annù nifò yï mə à kà'a a mbo bè bîi mə bi kòŋə nii aà.

⁶ Lâ ni tsa'a nî ɲgàŋəfumə aa, bè bîi mə bi niŋə nî ghu a nsyε, ɲkîi nswonə nî ghuu ɲghεε ni bù a nda mîsa'a aa à ni aa bîwò aa ε? A sï ɲgăŋkabə bə aa ε?

⁷ A ni tsi'ï bə mə bi ghàà nî ìnnù jï bi nlon ikum yî sigìnə wa mə bi fa a mbo bù aà.

⁸ La mbə ò ka naŋsə nləə nifò nòŋsə Nwî wa yï mə à tswé mùm àŋwà'ànə mə, “Ka ɲkòŋə ndîm ghò tsi'ï tsò o kòŋə ibîi nú gho aa,” bon ò ghirə sigìnə.

⁹ Lâ mbə ò ka nlentə nî bè ñyonə ni bē ɲkîrê yàà bəə bon ò wò mə annù, nòŋsə a kî ñtswa gho tsi'ï tsò ɲù yï mə kaa à si nòŋsə ləə aà.

¹⁰ Mbə ɲù a ka nləə bìnòŋsə bìtsim bεε mə a ghirə ɲghèè ɲwo yî m̀fùùrə a ni m̀n̄jîrê annù

boŋ à kî mē ñwo bìnòŋsè bya tsi'í bítisimè.

¹¹ Nloŋ mē ñu wa yíi mē à le nswon mē, “Tsuu annú mághàbè ghírè aa,” à le ñkî nswon mē, “Tsuu zwiwè.” Ma mùu ajàŋ, ò bē tsuu annú mághàbè ghírè, lá i bàŋnè zwiwè ñú boŋ ò wo nòŋsè.

¹² Tá ñìghàá nuu bo bì mìghìrìnè mi ìnnù muu tâ mì bē tsi'í tsó mǐ bē bii mē bi ka yí sa'a waa ni nòŋsè wa yíi mē à kètè mîŋkìrè mi atsaŋ a nu bē aa.

¹³ Nloŋ mē kaa Nwǐ à ka yí wa'à mìlìŋnè ñu yíi mē kaa à si mìlìŋnè ko aa kî ñko a noó nsa'a mǐsa'à. Ñko mìlìŋnè i kayi tsyatè ntso'otè mǐsa'à.

Abiintií bo bì ñka mǎ'à

¹⁴ Boo bi maà, m̀bè ñu a swon mē yu tswe nì àbìintií, kaa wa'à ni ìnnù jì sigìnè bàŋnè ghírè, a kwetè yi aa nì àkè aa ε? Kaa àjàŋè àbìintií ma yú kaa mbè a wa'à yi yweensè.

¹⁵ Mbè mumaà yi'inè yí m̀bàŋnè kè yí m̀ŋgyè a boŋè itsè'è a ñwe'ε kaa wa'à nì m̀jì mǐ mē ku'unè a nji a njwi njwi aa tswè,

¹⁶ bεε ñu ǹbò a swon a mbo bo mē, “Tá Nwǐ à ñiŋ mboonè a nu bù! Nì gheε tâ nù juu ka nloontè ñkii nji ywure!” boŋ a ka kwetè waa aa ni àkè mē mbè nì tsuu njoo jya mē i kwetè waa tâ bo tswe ntì aa, i fa aa ε?

¹⁷ A ni ajàŋ yíi mē a kî mbè aà, mē mbè ò tswe nì àbìintií yíi mē a si ghírè ò fa'a nì ìnnù jì sigìnè aà. Ajàŋè àbìintií ma yú à nì àkwo ayòò.

¹⁸ Lá m̀bè ñu yí mò'ò à tse swon mē, “O tswe nì àbìintií, m̀ b̀ŋnè m̀fa'a nì ìnnù jì sigìnè.”

Mbø a swoŋ ma mùu ajàŋ boŋ mè ka kwi'i ghu mbo mē, “Dì'i abiiintii yo ya a mbo mē, mē mbø ò tsuu innù jì sigìnè kì ghìrè, boŋ mè ka bàŋnə i dì'i abiiintii ya a nî innù jì sigìnè jii mē mē ghìrə aà.”

¹⁹ O bii mē Nwīŋgòŋ à ni aa tsi'i yī mò'otə aa ε? A boŋə! Lâ, tsi'î izwî jì bi i ki mbii maa ajàŋə, ñkii ntsiginə ghu nsî.

²⁰ Itirè bē, ni lòo nzi mē àbiiintii yī mē a si innù jì sigìnè fa'a aa, à ni àkwo ayoo aa ε?

²¹ A ŋghèè ni ta bì bitaà yī'inè, Abraham, tigè Nwī à le nlògè yi tso ñù yī mē mìnñù mi mi tsinè ñyoŋə aa nî ànnù yī sigìnè yī mē à le ŋghìrè aà. A le nlògə mu yī, Isaac, ŋghèè mà'à Nwī ghu a nìkentə ni mò'ə.

²² A laa mē Abraham à le mbii Nwī aa ñkii mfa'a, àbiiintii yi bo àfà'á yi a ghèè nî àbo mò'ò. Afà'á yi a ghìrè mē tâ àbiiintii yi ya tâ luu.

²³ Ma mùu ajàŋ ànnù yī mē àŋwà'ànə Nwī a le nswəŋ aa a fe'è mboontə mē, “Abraham à le nnin ntii yī a nu Nwī, ma ya a ghìrè mē tâ Nwī à lògə yi ni ñù yī mē innù jì i tsinə aà.” Nwī a tigè ñlògə Abraham nî ñsùkà'á yī.

²⁴ Yê ni, Nwī a lògè ñù tsó ñù yī mē mìnñù mi mitsinə, ntsya aa a ñjīm innù jì sigìnè jii mē a ghìrè aà, kaa wa'à yòŋə aa tsi'i a ñjīmə àbiiintii yi yu yu.

²⁵ A le ñki mbø tsi'î ñgĩŋ ñgĩŋ ni Rahab, àkwàrè mángyè wá. Nwī à le nlògè yī tsó ñù yī mē innù jì i tsinə, ntsya aa a ñjīm innù jii mē à le ŋghìrè aà, à le ñkwèrə bìtswèrè bi baIsrael bya a nda

yu, ñki mbu nghìrè bi tsyâ ni mânji yî dàn ñkhè waa.

²⁶ Ma mùu ajàn tsõ mæ mbæ àzwî a tsuu a nu ñu tswe, a bê àkwo ñu aa, àbïintii yï mæ a si fà'à a ki mbæ aa àkwo ayoo.

3

A ku'unə mə tâ bə ka ntswa aləə yaa

¹ Bîlîm bâ, kaa sî bôn mæ tâ bù bî ghà'àtè bə ngǎṅdì'innù, ñlon mæ ìsa'a yi'inè tsõ ngǎṅdì'innù i ka yï tînsě tsyàtə yï bê bî mɔ'ò.

² Bî'inè bitsim, bî'inè gha'a fansə nî innù. Lâ mbæ ñu yï mɔ'ɔ a tswe ghu yï mæ à si nii ifansə innù ghirə a nî innù jï mæ a swonə aa, bon innù ji i bon mǎṅsè, a kî ñzi a ajàn yï mæ mbæ yu tswâ ìbînnú yi tsimè.

³ Bî'inè niṅə nî àtsanə a ntsũ lonə nghire ni mæ tâ à ka nyu'unə nî yi'inè. Maa ajàn bî'inə zi ajàn yï mæ mbæ bî'inə ghirə a ghèè ní mbèè yï mæ bî'inə kɔṅ aa.

⁴ Kè tâ bî'inè wa'atə annù ñlon abanə ñkì. Ka mæ a fan fan a kii ntii tsi'î afisè yï tii aa, bi tsisè aa tsi'î nî mûntsirê àtsisè, ñswùnə àban a zi ajàn yï mæ mbæ yu tsisè a ghèè ajàn yï mæ à kɔṅ aa.

⁵ A kî mbæ ngiṅ ngiṅ a nî àləə yï mæ a tswe a ntsũ mbî'inè aà. Ka mæ a kə'ə ñkə'ə aa, mbæ tsi ki kwèè ntii yi a nî innù jï wè jï wè jï mæ mbæ a ghirè aà.

Wa'atə ajàn yï mæ mbæ tsi'î ñsàà mɔ'ɔ i tɔò ma mù'ù nta'a aà.

⁶ Aləə a bə aa tsi'î tsõ mɔ'ɔ. A burə mbæ aa mbî yï mæ ì lùu nî innù ji bî, ntswe ni àdà'à a mûm nu

bì'inè, òsɛɛnsə nî ìnnù jî bi, i ghèè nî ìlàà a mûm nû bì'inè tsi'í tsimè. Ntɔɔ nî òtswèntìi yí'inè tsi'í tsim nî ìnsàà mɔ'ɔ yíi mə ì lò aa tsi'í a mɔ'ɔ Satan òzi.

⁷ Nùmìsòŋ à zî àjàŋ yíi mə mbə yu mirèsè ògòŋ ònaa tsim jîi mə tswé a nta'a kè a mûm òkí aà, kè a bə bə nàà mitsə'ə, kè bə bìsiŋ, kè ìbəŋ naà tsó òò, kè nàa òkí, bi lèè òkí ya'a mmirisə

⁸ lá kaa òù mìsòŋ kaa a wa'à àjàŋ yíi mə mbə yu mirisə aləə aa bàŋŋè òzi. Aləə a nî àyòò yí bì yíi mə a ligə tsi'í lìgè, òtsyanə a ntsisə, òluu nî òlì'i yí m̀bi yíi mə mbə i zwiè òù aà.

⁹ Bì'inə lògè ògha'asə nî ma'àmbi Taà yí'inè Nwìŋgòŋ ghu. Nkii mbu òlògè m̀bègìtə nî bìlìm bì'inə bìi mə Nwì à lɛ nnaŋsə waa bi finè yi aa ghu.

¹⁰ Mìghàà mi ògha'asə Nwì bo bì m̀bègìtə mi fè'è aa tsi'í a ntsù yí fùùrè! Bìlìm bà, kaa a sè kù'ùnè ma mùu àjàŋè.

¹¹ Kaa m̀bə naŋəbirè yíi mə òkí yí lèè i fè'è ghu aa, kaa mbə a wa'à kè mbu ka mfi'isə òkí yí lwì.

¹² Bìlìm bà, kaa m̀bə àtí kòò a wa'a mbàŋ sa'a bə, kaa àti lamsì kaa mbə wa'ă ikòò koonè bə. Kaa òlì nìi mə òkí yí lwì i fè'è ghu aa, kaa mbə ni wa'ă òkí yí òò kè mfi'isə.

Mìtsyè müi mə mi lò nî bə aburə àà

¹³ Nù tsù à tswè a titìi bù yíi mə à tsyèsə òkii naŋsə nyu'u nî ìnnù i laa ghu atu aa ɛ? Tà à ghìrə tà à fè'ɛ bì yə tà àlaa, òtsya aa a òjim àkòrè òzì yi yí sigìnè, a ti ghìrè nî ìnnù jî sigìnè a ká sigisə nî ìbìi nù yi a nsyè à ni a ndi'ì m̀tsyè mi ghu.

14 Lâ m̀bə̀ ̀ ̀ tswe nî àghè'ènè a m̀m̀m̀ ǹt̀ìi wò, nî àlwintòŋ, ñka nloɔ tsi'ï àyoò ànnù, ̀ tsuu ǹt̀ìi gho ki kwèè, ntuu nî ànnù nîŋkonè.

15 M̀buu m̀tsyè ma wa kaa i s̀i aa aburə lô. A ni m̀tsyè m̀i f̀aa mb̀i, kaa Azw̃ Nw̃i kaa a wa'̀a ghu tswé, mi baŋnə̀ lò aa a mb̀ô izw̃i j̃i b̀i.

16 Adigə̀ ỳi m̀ə̀ àghè'ènè tswe ghu ñu a loò b̀ê ànnù ỳi m̀ə̀ a ka kwetə̀ yi aa, ìbuurə̀ annù i kə̀ ntswe ghu, a k̃i ñluu nî m̀buu ìnnù j̃i bi j̃i ghà'atè.

17 Lâ m̀tsyè mya m̀i m̀ə̀ mi lo a aburə̀ aa, mi tsyâmb̃i m̀foo nlaa, ñzi nî m̀bɔɔnə̀, mbɔnə̀, nyu'utə̀ nî ànnu ỳi b̀è swonə̀ aa, ñko ni m̀l̃ŋnè, ñkoonə̀ ni m̀intàà mi ìnnù j̃i sig̃inè. Kaa ñu ỳi m̀ə̀ à tswe ni ma muu m̀tsyè aa kaa à si j̃iŋkè, kaa k̃i ì ñi b̀è k̃i mbwe'esə̀ b̀ê.

18 Ìnnù j̃i ts̃iŋè ì laa mbə̀ m̃ji m̀i m̀ə̀ bi f̀ù'ù ñi ñjoo ñgwè'è j̃i m̀ə̀ b̀è b̃i m̀ə̀ bi z̃i ni m̀bɔɔnə̀ bi b̀è ñi m̀bɔɔnè aà.

4

Ŋghiré àkà'̀a bu bi m̀b̃i

1 Ntsò bo bi f̃ikòrè f̃i f̃i tswe a t̃it̃i bù, lò aa fə̀ ɛ? A si njoo j̃i bi j̃i m̀ə̀ m̀int̃i muu mi yè'ətə̀, kaa wa'a b̃i m̀ə̀ t̃a ñi ñe'esè ntswe aa m̀ə̀ gh̃irè m̀ə̀ ni ka nto aa ɛ?

2 Ni lòo njoo, bæɛ ñi yi ntsuu ni ju tswe aa, ñi tigè ñtanjə̀ a nzwitə̀ b̀è. Nt̃i gh̃uu i yè'ətə̀ njoo, lá tsò m̀ə̀ kaa m̀bə̀ ñi wa'̀a ni ju tswe aa, ñi tigè ñyòŋə̀ bù ni bù, ñk̃i ñtigə̀ ntonə̀ bù ni bù. Kaa ñi si ni ñjoo j̃ya tswe aa, nloŋ m̀ə̀ kaa ñi si Nw̃i betə̀ ni m̀ə̀ t̃a à fa a mbo bù aà.

³ Lâ nî yi ntɛ'ɛ mbetə betə aa, kaa nî wa'à kwɛrə aa nloŋ mə nî betə nî mânjî yîi à sî ku'unə aà. Nî betə njoo aa mə nî lògə kî fà'à nî ìnnù jîi mə i ghìrə nû juu i ka mboŋə aà.

⁴ Bũ bê bîi mə nî bə tsǒ mànɣyɛ nìyɔ'ɔ yîi mə a jî mǎghàbè aa, nî sî zi mə nî bə kî kǒŋ mbi yù boŋ nî bàà aa Nwĩ a ɛ? Ma mùu ajaŋ a bə mə ñù ntsìm yîi mə à nî nsùkà'a mbi aa, à nî ñgàŋkìbàa Nwĩ.

⁵ Nî tsuu lõ lògə mə àŋwà'ànə Nwĩ a tswɛɛ annù mə swoŋ mə, “Azwĩ ya mə Nwĩ à lɛ nniŋ a ntiì bî'inə aa a yè'ətə nî ñjoo tsi'ĩ mbê annù.”

⁶ Lâ m̀bɔɔnə yîi mə Nwĩ a fa nî a mbo bî'inə aa, i ghìrə nî mə bî'inə baŋnə ntìnsə ntsyǎ àzwĩ àyè'ətə ma yû. Ajǎŋ mə àŋwà'ànə Nwĩ a swoŋ aa mə, “Nwĩŋgòŋ a tuu ŋǎŋŋee nu, nniŋə nî m̀bɔɔnə a nu bə bîi mə bî baŋnə ñsigisə nî ìbìinù waa a nsyɛ aà.”

⁷ Lâ, nî sigisə mbìi nû yùù n̄fa a mbo Nwĩ, ñka ntuu nî ànnù Satan boŋ à ka kî ñkhə nî ghuu.

⁸ Nî ka nyoŋtə nî a mbèɛ Nwĩ tâ à kî kaa nyoŋtə nî a mbèɛ bù. Nî si'i mbô muu mbâ, bu ŋǎŋghìrê ìnnù jî bî. Nî ghìrə tâ m̀ntiì muu m̀ laa mbâ bu bîi mə nî tswe nî m̀ntiì mi mbaà.

⁹ Nî ka n̄joŋnə, ntigə mbo'o, ñkii nyə'ə; tâ n̄wyê nuu baŋnə mbəŋ ntigə n̄iyè'ə, ñghìrə tâ n̄idorè nuu nî bəŋ ntigə ajəŋnə.

¹⁰ Nî sigisə mibìi mi nû muu a nsyɛ a nsi Mmà'àmbi, boŋ à ka ŋɛntə ghuu a ndəŋə.

Ñwà'àsə nloŋ annù ñka nsya muswêbo a nu ndim ghò muKристо

11 Nì tsuu ghuu bù ni bù ki firè mbâ bilîm bâ. Nù yîi mæ a firè mu Kristo, ñkii nsa'a nii aa, a ligitè aa nòñsè ñkii nsa'a nî nòñsè wâ. Mbè ò ka nsa'a nî nòñsè bèè boñ kaa ò sî ñû yîi mæ a yu'unè nòñsè aa bê, ò bânñè mbè aa ñgànsa'a mîsa'à.

12 Nwîngòñ à ni tsi'î yùyu yîi mæ a fa nî nòñsè ñkii nsa'a aà. A ni tsi'î yù mæ mbè a yweensè ñû ñki nzwitè yi. O lògè ibii nú gho aa nî wò a ñka ntso'otè isa'a ndîm ghò aa ε?

Ñwà'àsè nloñ annù ñkwεε ntî

13 Nanşè nyu'utè nì mîbâ bu bîi mæ ni swonè ni mæ, “A ka ghìrè bè sii, kè à ka lõ bè a yoo tâ bî'î ghεε fii njò'ò àlà'à lîi, ñghεε ntswe ghu a atú àlòò, i tanè mîtaa ghu, i nanşè i iswe nì àbîi ghu aà.”

14 Kaa nì sî ajàn mæ ñtswëntîi yùu i ka lõ bè a yoo aa zî. Nì bè aa tsi'î tsò mîbà'à tîugè yîi mæ i yi mfè'è i bú ñwi'ikè mbwεkè yi aà.

15 Mbè nì bânñè ñswònè aa bè mæ, “Mbè Mmà'àmbi a beentè boñ bî'î ka tswe bitîi, i ghìrè lâlâ, kě i kii ghìrè lîi.”

16 Lâ tsîtsòn ñi ñee nî nú juu, ñkii ñkwεε nî ñìgò nuu, kaa a wa'à kù'unè.

17 A nlwî'isè, ñù yîi mæ à sî annù yî sigìnè yîi mæ à zi mæ a ku'unè a ñghìrè aa, ghìrè aa, à ghìrè bî.

5

Ñwà'àsè ñgänkabè

¹ Ngǎṅkabè, yu'utè nǎ annù yǐi mē mē swonə nǐ a mbo bù aà. Nǐ ka mbo'o, ŋkii nyə'ə nǐ tì nlon ŋgi'i yǐi mē i zǐ a nu bù aà.

² Afù'ù yuu a bwè mē, n̄səkè ì jī ìtsè'ê juu.

³ Ntsəbè ì kô mē gold ghùù a bò'ɔ nǐ silva ghùù. Ntsəbè ma yu ì ka bə ayəfə nǐ ìnnù jǐi mē nǐ ghìrè aa, ì kii tigə kurə nǐ ìjyǎnú yùù tsi'ǐ tsǒ mɔ'ɔ. Nǐ ghòtə ñjoo jǐ ghà'atè ñləə nǐ ñjwi julà mē nǐ njwi nlwǐ'ǐ ñjìmè aà.

⁴ Kaa nǐ burə tǐ ŋkabè bè bǐi mē bi fa'a a múm m̄nsòò bù aa tǔ. Yu'u nǐ àjàṅ mē bo ghàantè aà. N̄iyè'è nǐ bē bǐi bi fù'ù mijǐ muu a múm ñsòò aa nǐ ghèè mē ñku'u a tónə Mmà'ambí Mbu'utèmbí.

⁵ Ntswéntǐ yùù ì luu nǐ ñjoo jǐi mē ì ghìrè nú yùù ì bonə aà, wa nǐ n̄ansə mē ñjǐ mbí. Nǐ jǐ mē mfanke mfe'ɛ ntigə mbə tsǒ nàà jǐi ì yu'utə nǐ ñjwi yǐi mē bi ka wà waa ghu aà.

⁶ Nǐ sà'à mē m̄isa'a mi bē bǐi ìnnù jyaa ì tsinə aa, ñniṅ ŋgi'i a nu bo, ñzwitə nǐ bè tǐ ñji'i, kaa bo wa'à waa kwɛ'è.

Ntswà ñtǐ bo ñka ntsà'atè Nwǐ

⁷ Nǐ ka ntswa m̄intǐ muu mbâ bil̄m mbâ, ñywe'e a njwi yǐi mē Mmà'ambí à ka yǐ bǔ zǐ aà. Nǐ yê àjàṅ yǐi mē ŋgànligə m̄nsòò a tswa ntǐ yi nyu'utə nǐ mē tâ ñsyə ghìrə m̄ijǐ kɔ'ɔ aà. Ntswa nǐ ñtǐ yi mbe nǐ noè ñtsú mbəṅə bo bi noè ñtsyâbèè tǎ fù'ù mijǐ myâ.

⁸ A ku'unə mē tâ nǐ ka ŋkii ntswa m̄intǐ muu. Nǐ tswa ab̄intǐ yu tâ à t̄nsə ñlon mē noè ñzi Mmà'ambí yi'inè à kòontè mē aà.

⁹ Nì tsuu ghuu ni bù ni bù ki ghàantè mbâ bilîm bâ, tã tâ Nwĩngòŋ à tsuu isa'a a nu bù lõ niŋə. Wa ñgàŋ nsa'a mîsa'a wa à kòontè m̃, wa à t̃è a ntsũndâ.

¹⁰ Bilîm mbâ, nì ka ñwa'atə ɲgǎŋtoo Nwĩ jya j̃i m̃ i le si ghàa ni ðkũm Mmà'àmbi aà. Nì logə waa tsi'ĩ tsǒ àlènsè b̃ b̃i m̃ bi tswa ntii waa a noò ñgi'i aà.

¹¹ Bì'inè yə m̃ Nwĩ à le nniŋ mbɔɔnə a nu bo aa ajàŋ ỹi m̃ bi le ntswe ni àtəŋəntii aà. Ni yu'u ñi ànnù ñlonə àtəŋəntii Hiob. Nì ki nzi ajàŋə àfù'ù ỹi m̃ à le ti b̃ə ni a ñj̃im Nwĩ à fa ghu mbo aà. Tsi'ĩ annù ñiŋkoŋə, Mmà'àmbi a yu'u niyè'ə ni b̃ə, ñko ni m̃l̃iŋñə b̃ə bi.

¹² A mbũ ɲghèè ghu bilîm bâ, ma ànnù à ni m̃, nì tsuu ki kàa. Nì tsuu aburə, k̃ ñsyɛ, k̃ ayoò tsu ki lõgə kàa ghu. Nì ghirə tâ ñŋə ghùù à b̃ə ñŋə, tâ ñganə ghùù à ki mbə ɲgan tã tâ Nwĩ à tsuu isa'a a nu bũ lõ nniŋə.

Ntsà'àtə Nwĩ ni àb̃iinti

¹³ Nù tsù a titii bù à tswe a m̃m ñgi'i aa ε? A ku'unə m̃ tâ à ka ntsa'atə Nwĩ. Nù tsù a titii bù a doritə aa ε? A ku'unə m̃ tâ à ka nyəə ikòò ñgha'asə ñi Nwĩ ghu.

¹⁴ Nù tsù à tswe a titii bù ỹi m̃ a ghòò aa ε? Tã à too ɲk̃i a mbo bilii bi ndânwĩ tâ bi zi ntsà'àtə Nwĩ ghu atu, ñyo'ɔ yi ni m̃ghurə ni ðkũm Mma'ambî.

¹⁵ Atsà'àtə ma yû m̃ bi tsa'atə ñi àb̃iinti a ka ghurə ɲu ñghòò wa. Tã Mma'ambî à bu mfa ntsw̃enti ỹi fu ghu mbô, b̃ɛɛ a b̃ɛ ỹi m̃ à f̃ansə annù boŋ Nwi à ka l̃i'ĩnə ib̃i yi.

¹⁶ Ma mûu ajàŋ nì ka mbii ifǎnsənnù juu bu nì bù, ñka ntsa'atə nî Nwî a atu bù nì bù. Tǎ tâ mǐghòó muu mǐ ka mfwetə. Atsà'atə Nwî ñû yǐi mə ànnû yi a tsinə aa a tswe nì mǐdàdà'à mǐ wè.

¹⁷ Elijah à ɛ mbaa ñki mbə ñûmǐsòŋ tsǒ bǐ'inə. A ɛ ntsà'atə Nwî tsi'ǐ nì ntiǐ yi ntsǐm mə tâ mbəŋ tsuu loo. Kaa mbəŋ i wa'à kǐ ñloo a ala'a a atú ìlòò ji tarə nì àtiǐ.

¹⁸ Hlòò majya i jyà mē a bû ntsà'atə Nwî fu, mbəŋ i swi'ǐnə a aburə ñghirə mǐji bû ñkɔ'ɔ fu a nsyê.

¹⁹ Bǐlǐm mǐbâ, mbə ñû yǐ mɔ'ɔ a titǐi bù a fâ'à mǎnǐ ànnù nǐŋkoŋ bεε ñû mò'ɔ a bû ñswuŋtə yi mbii nì ghu fu,

²⁰ tâ nì zi mə ñû yǐi mə à ghìrə ñgàŋghirə ìnnù jǐ bi a ma'atə ìnnù jǐ bǐ ji jya aa, à yweensê ntiǐ yi a ntsǔ nìwô, ñghìrè bi li'ǐnə ìfǎnsənnù jǐ ghà'atə.

Bafut
Bafut: N̄toò Kristo yî N̄sigìnè: mìkàà yî mfì New
Testament

copyright © 1999 Wycliffe Bible Translators, Inc.

Language: Bafut

Contributor: Wycliffe Bible Translators, Inc.

All rights reserved.

2025-04-26

PDF generated using Haiola and XeLaTeX on 25 Apr 2025 from source
files dated 26 Apr 2025

5d039b4a-c9a1-50b1-8a61-176cf48aa271